

**Mirsad Hadžikadić:**

Trenutno razvijamo našu unutrašnju organizaciju, a tokom tog procesa učimo na koji način da odaberemo najbolje kandidate. Učimo na sopstvenim greškama, ali učimo i iz svojih uspjeha. Ovaj proces nam je omogućio da pronađemo sjajne ljude, veoma sposobne, koji će predstavljati izuzetno značajan faktor, ne samo za Platformu za progres, već i za Bosnu i Hercegovinu uopšteno. Osim toga, planiram da posjetim i nekoliko evropskih zemalja. Između ostalog, putujem u Švicarsku, gdje ću prema najavi organizatora održati prezentaciju pred oko 500-600 ljudi koji dolaze iz oblasti na tromeđi Švicarske, Njemačke i Francuske. Zatim ću krajem februara i početkom marta posjetiti Austriju i Švedsku. Nakon toga slijedi još jedan odlazak u Austriju, te posjeta Njemačkoj. Znači, to su planirane posjete našim ljudima za koje se pripremamo. Naše trenutne aktivnosti vode se na nekoliko frontova. Kao prvo, radimo na proširenju organizacije, a kao drugo, pokušavamo da utvrdimo naše unutrašnje procese, donosimo neophodne interne akte, formalizujemo procese, i slično. Završavamo proces unutrašnjeg odabira odgovarajućih ljudi, te unapređujemo operativne sposobnosti za efikasno djelovanje. Pored toga, formiramo i timove ljudi za internu koordinaciju, kao i za marketing, odnose s javnošću, prikupljanje sredstava, analitiku, i tako dalje. Znači, imamo puno aktivnosti koje se dešavaju istovremeno, a pred nama je još puno posla. Pored toga, pažljivo pratim i političku situaciju u zemlji, u kojoj postaje sve teže formirati vladajuće koalicije na različitim nivoima vlasti, od kantonalnog, preko entitetskog, pa sve do državnog nivoa. Sve je jasnije da u ovoj državi nema prave opozicije, kad govorimo o idejama. Ima stranaka koje su u opoziciji, ali iz jednostavnog razloga što nisu dobile dovoljan broj glasova da budu među strankama u vlasti. Međutim, one slično razmišljaju, slično djeluju i slično se ponašaju. Tako da se može reći da je Platforma za progres jedina intelektualna snaga, koja se razlikuje od stranaka koje su uobičajene u ovoj zemlji.

**Clark Curtis:**

Daj nam malo više detalja o tome. Koji izazovi stoje pred tobom i pred Pokretom u tom pogledu? Kako ja to vidim, očigledno je da vas drugi uzimaju zaozbiljno. Ako postoje određene negativne reakcije ili poteškoće, neko to primjećuje. Meni to tako zvuči.

## **Mirsad Hadžikadić:**

Moram reći da sve više ljudi sa svih strana iskazuje poštovanje prema ono što radimo, kako interno, u zemlji, tako i van nje. Govorim o svjetskoj zajednici, odnosno o zemljama članicama Evropske unije i njihovim političkim predstavnicima. Na primjer, u Švicarskoj ću razgovarati s ljudima iz njihovog parlamenta koji su nadležni za kreiranje politika za ovaj dio svijeta. Ono što pokušavamo da uradimo jeste da uspostavimo ličnu odgovornost i promijenimo način razmišljanja ljudi. U potpunosti vjerujemo da će do promjene doći krenuvši od nižih nivoa ka višim, a ne obrnuto. Stranke koje su na vlasti preko 20 godina, od rata, jasno su pokazale manjak sposobnosti da državu vode u pravom smjeru, prema Evropskoj uniji, prema prosperitetu, slobodi, pravdi i jednakosti. Mi pokušavamo da probudimo ljude, da im kažemo da ne smiju da stoje postrani i da čekaju da neko drugi nešto preduzme, jer se to neće desiti. Dvadeset i nešto godina je dovoljno dug period, u kojem su se svi mogli uvjeriti u ograničenja nacionalista koji vrše vlast gotovo cijelo to vrijeme. Ovo mora da bude država koja je u potpunosti demokratska, s jednakim pravima za sve njene građane, bez obzira ko su. Moramo da kreiramo političku opciju i glasamo za ljude koji na prvo mjesto stavljaju državu, a ne svoje lične interese ili interese svoje političke stranke. Znači, to je zadatak koji stoji pred nama, da formiramo koaliciju spremnih, sposobnih i odgovornih građana koji će donijeti promjenu koja treba da se desi u ovoj zemlji. Izuzetno mi je drago što smo definisali našu političku organizaciju kao pokret, a ne kao stranku, jer smo na taj način naša vrata otvorili svima, bez obzira na njihovu političku ili bilo koju drugu pripadnost. I želimo da im pokažemo da je to moguće uraditi i na propisan način, s integritetom i sposobnošću, uzimajući u obzir potrebe drugih ljudi i potrebe zajednice prije svega. Naravno, nećemo dozvoliti da to budu članovi tijela koja donose odluke u nekoj od političkih stranaka, jer ne želimo da sputavaju razvoj organizacije. Nećemo ih stavljati na naše liste kandidata za različite pozicije, jer ne želimo da promovišemo druge stranke, ali ćemo im dopustiti da utiču na naš proces donošenja odluka, odnosno da učestvuju u njemu, kako bismo im pokazali da vjerujemo da oni mogu da djeluju u najboljem interesu svih nas, da glasaju za dokumente, da daju komentare na dokumente, i slično. Želimo da kroz taj demokratski proces shvate da se određene stvari mogu uraditi na drugačiji način, a ne na način na koji su navikli, kod kojeg

predsjednik političke stranke utvrđuje pravila i iznosi svoje mišljenje koje oni dalje propagiraju. Ovo je mjesto na kojem će oni imati sopstveno mišljenje koje će biti saslušano i uzeto u obzir. Nakon toga ćemo svi zajedno učiniti ono što je najbolje za Pokret i za državu. Smatram da nas to više od svega drugog definiše i odvaja od ostalih. Naravno, mi imamo ekonomski program, kao i ideje za promjene u obrazovanju, zdravstvu i pravosudnom sistemu, ali ovo je najvažnije. Ljudi treba da uzmu problem u svoje ruke i preduzmu nešto po tom pitanju, a ne da krive međunarodnu zajednicu i sve druge za situaciju u kojoj se nalaze.

**Clark Curtis:**

Reci nam nešto više o preprekama s kojima se suočavate u procesu osnivanja širom zemlje. To je težak zadatak sam po sebi, a čini se i da postaje sve teži, kako za tebe, tako i za Pokret.

**Mirsad Hadžikadić:**

Teško je pronaći ljude koji nisu iskvareni ovim procesom koji je prožet korupcijom i povlašćenošću, odnosno koji se nisu uključili u politički proces isključivo kako bi zauzeli mjesto ispred drugih ili kako bi osigurali radno mjesto u nekom od javnih preduzeća. Oni koji su dio procesa, željeli oni to ili ne, na određen način su prihvatili drugačije norme ponašanja, koje mi u Platformi smatramo neprihvatljivim. Ima i onih koji nikad nisu bili uključeni u taj proces, pa su politički neaktivni ili apolitični, jer smatraju da se ništa ne može promijeniti, ili se jednostavno spremaju da odu. Tako da mi u njima moramo da probudimo spoznaju da moraju da povedu računa o svojoj zemlji, kako bi shvatili da bez njihovog angažmana nema ni napretka zemlje. Znači, moramo da probudimo ljude koji dosad nisu bili aktivni. Inače, najznačajnije uspjehe ostvarujemo s mladim ljudima. Gotovo pola članova Platforme mlađe je od 40 godina, što je zaista velik uspjeh. Mislim da je oko 30 odsto članova mlađe od 35 godina. To je sjajno, i to mi zaista puno znači. To će biti naša snaga. Naravno, kad su u pitanju mladi ljudi, oni posjeduju entuzijazam, otvoreni su za nove ideje, ali im manjka iskustva. Tako da na neki način moramo da spojimo mladost i iskustvo. U tom smislu, jedna od naših aktivnosti podrazumijeva osnivanje akademije u okviru Platforme, koja će im pomoći na polju obuke i edukacije. Jedan od programa akademije će biti političke prirode, kako bismo mlade ljude upoznali s političkim sistemom i

objasnili im šta znači biti aktivan, koje su nadležnosti pojedinih nivoa vlasti, šta jedan kandidat za određenu političku funkciju treba da radi kako bi bio izabran, s kakvim odlukama ili pitanjima bi se suočili kao predstavnici na određenom nivou vlasti, i slično. Nekad čovjek jednostavno nije upoznat s određenim stvarima. Neko vam preporuči određenu osobu koju ne poznajete, tako da morate da potražite podatke na internetu ili da se raspitate o toj osobi. Na kraju to sve ispadne dobro. Mada nikad ne znate. A naš proces je takav da smo pronašli tek prvobitnu grupu ljudi, koji su bili zaduženi da tu grupu prošire i da formiraju inicijalni odbor na opštinskom nivou, da organizuju skupštinu na kojoj svi koji vjeruju u ovu ideju razgovaraju međusobno, nakon čega oni biraju aktuelni odbor koji će biti nosilac aktivnosti u toj opštini ili gradu. Osim toga, oni biraju i delegate za skupštinu na kojoj se biraju predstavnici za cijelu regiju. U suštini, mi se nadamo da će primjenom procesa u okviru kojeg se pitanja rješavaju od nižih ka višim nivoima iz mase ljudi koji su dio procesa na površinu isplivati pravi ljudi kao potencijalni lideri, koji će imati potrebne osobine kako bi na svoje zadovoljstvo, ali i na zadovoljstvo Platforme, bili dostojni predstavnici i lice Platforme. S jedne strane, proces širenja organizacije ima i dobre i loše strane. Dobra strana je ta što ćemo obuhvatiti veći broj ljudi. Loša strana je ta da bi se mogla pojaviti jedna ili dvije osobe koje iz nekog razloga nismo valjano provjerili ili verificovali, a koje bi se mogle ispostaviti veoma lošim. A to može da naruši reputaciju cijele Platforme. Zato je teško, ali i važno to uraditi na pravi način.

**Clark Curtis:**

Da, to su kompleksne situacije s kojima se suočavate. A u koliko opština i gradova širom zemlje planirate da osnujete Platformu? Imate li neki broj kao cilj?

**Mirsad Hadžikadić:**

Mislím da ukupno ima oko 140 opština. A mi smo rekli da nam neće biti toliko važno ostvariti kvantitet, već da nam je važan kvalitet. Kandidate ćemo imati u onim sredinama u kojima pronađemo dobre ljude, u koje ćemo imati povjerenje. Tu podrazumijevamo dvije kategorije ljudi – one koji će biti kandidati za načelnike i one koji će biti kandidati za lokalne vijećnike. Naš cilj, ili spisak želja, jeste da dobijemo između 10 i 25 pozicija načelnika, što bi donijelo i

određen broj vijećnika, mada je taj broj trenutno teško procijeniti. Brojka od 25 načelnika je cilj kojem težimo. To bi bio izvanredan rezultat. Ali mi želimo da izađemo s našim kandidatima kako bismo pokazali da se ne plašimo da sanjamo, ali i da sami sebe podsjećamo da moramo da uložimo puno truda kako bismo taj cilj i ostvarili. S druge strane, brojka od 10 načelnika je ostvariva, i takođe zahtijeva puno truda, ali to će pokazati snagu Pokreta i pripremiće nas za uspjeh na opštim izborima za četiri godine. Sve u svemu, 10 bi bio odličan rezultat, a 25 bi bio izvanredan rezultat. Svaki rezultat između ova dva pokazao bi našu snagu. A u slučaju da broj bude manji, to će nam pokazati gdje smo uspjeli, koje su nam slabosti, kako i na koji način da se razvijamo, ali bi to ujedno zahtijevalo i puno objašnjenja zašto nismo ostvarili bolji rezultat, i slično.

**Clark Curtis:**

Moje posljednje pitanje odnosi se na vaše aktivnosti na osnivanju Platforme u drugim evropskim zemljama. Koji su ciljevi Pokreta kad su u pitanju sastanci i razgovori s liderima u drugim državama? Koji su tvoji ciljevi i ciljevi Pokreta, odnosno šta očekujete da bi vam ti sastanci mogli donijeti u budućnosti?

**Mirsad Hadžikadić:**

Pokušavam da ustanovim u kojoj mjeri je međunarodna zajednica spremna da djeluje u BiH i da joj pruži podršku. Znam da gotovo sve članice Evropske unije, koje predstavljaju svjetske sile, govore političarima u Bosni i Hercegovini da sami treba da rješavaju svoja unutrašnja pitanja, da su u pitanju njihovi problemi i da oni moraju da postignu dogovor, predoče ga njima, nakon čega će im oni pomoći u utvrđivanju puta ka Evropskoj uniji, i slično. Drugim riječima, oni na nas vrše pritisak. Istovremeno, ti političari, odnosno nacionalisti, to koriste kao priliku za daljnje svađe i podjele. Međutim, to je samo privid, jer oni u stvarnosti sarađuju jedni s drugima na obmanjivanju ljudi podstičući strah među njima. Tako da ja pokušavam da uvjerim evropsku zajednicu da moraju da shvate interne procese. Doduše, oni to i čine, ali i dalje nisu spremni da intervenišu na svrsishodan način. Ja shvatam zašto je to tako, ali moram i da shvatim na šta su oni spremni, dokle su spremni da idu ili ne idu, kako bismo jasno uvidjeli s čim imamo posla i

kako bismo utvrdili naš plan djelovanja. Sve u svemu, ti razgovori s međunarodnom zajednicom, parlamentarcima i ambasadorima su veoma korisni i informativni. Pokušavam da saznam određene stvari, ali pokušavam i da im na što efikasniji način i u što većoj mjeri prenesem i svoja mišljenja i stavove. Međutim, ja ne svaljujem krivicu na njih, već im jednostavno govorim da sam tu da ponešto saznam, ali i da ih ponukam da shvate našu poziciju. Ne ustručavam se da kažem da je odgovornost na nama, i vjerovatno sam jedina osoba u državi koja govori da je odgovornost na nama. Ne samo na političarima, već na svakom pojedincu u zemlji. Mislím da će to na kraju biti uspješno, i da je jedini mogući način taj da se probudimo, zasučemo rukave i donesemo odluku da nešto preduzmemo. Međutim, ja sam i pragmatičar, i svjestan sam da će nam trebati puno vremena, puno rada, puno novca i puno dobrih ideja. Biće nam potrebno djelovanje na više frontova, kao i saradnja s međunarodnom zajednicom, a posebno s Evropskom unijom, kako bismo ostvarili željeni cilj.